

Uunga

allannguutissatut siunnersuut

**Inissialiornermut, illunut ataatsimoorussanut, illuliassanut il.il.  
tapersiissuteqartarneq pillugu Inatsisartut peqqussutaat nr. xx, af dd. mm  
2007-imeersoq**

Naalackersuisunit aappassanneerinissamut saqqummiunneqartoq.

§ 13-imut

1. § 13, imm. 1, imatut oqaasertalerneqassaaq:

"Naalackersuisut kommunit inissiaataannik attartortittakkanik sanaartornermut kommunit imm. 2-mi nr. 1-imiit 3-mut aalajangersarneqartunut tapiissuteqarsinnaapput."

2. § 13, imm. 3 atorunnaarpoq tamatumalu kingorna imm. 4 imm. 3-nngorpoq.

§ 39-mut

3. § 39 sioqqullugu qulequtaq imatut oqaasertalerneqassaaq:

*"Taarsigassarsianik allanngortitsineq aamma isumakkeerineq"*

4. § 39, imm. 1 imatut oqaasertalerneqassaaq:

"Taarsigassarsiallit, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasut, imaluunniit taarsigassarsiallit, piffissaq manna tikillugu isertitai apeqqutaatinnagit siunissami qaninnermi ukiumi akileraaruteqarfiusussami inoqutigiinni akileraaruteqaataasussanik 180.000 koruunit inorlugit isertitaqartussatut naatsorsuutigineqartut, akiliutissaat akiligassanngortinneqartut, akiitsui akilinngitsuukkat, akileequisinermut akitsuutit akiligassaat akiitsuisalu sinneri Naalackersuisut allanngortissinnaavaat. Taarsigassarsiallip akiliisinnaajunnaarnerani, akiliisarnermik unitsitsinerani, isumaqatigiissutit uniorlugit iliuseqarnerani, akiliisinnaannginnini pissutigalugu unitsitsinerani, taarsigassarsisoq tammaaneqartoq toqusimasutut isigineqarneranik eqqartuussisutigut aalajangiinnermi, piginnittut nikinneranni kiisalu inissiaq

isaterneqartussanngorpat taarsigassarsiat erniaqanngitsut akilersugassaannngitsullu akiligassanngortinneqassapput."

#### § 40-mut

5. § 40 imatut oqaasertalerneqassaaq:

"§ 40. Taarsigassarsiallit, ukiuni akileraaruteqarfiusuni kingullerni marlunni inoqutigiinni akileraaruteqaataasussanik 180.000 koruunit inorlugit isertitaqarsimasut, aammalu taarsigassarsianut akiligassaarussimasut, taamaallaalli taarsigassarsianut akiitsunik akilinngitsuugaqarsimasut, akiitsui angeqqatigiimmik aningaasartalerlugit qaammatinut 60-inut Naalakkersuisut nalikilliartuaartissavaat."

#### § 41-mut

6. § 41 imatut oqaasertalerneqassaaq:

"§ 41. Taarsigassarsiat § 39 naapertorlugu akiligassanngortinneqarsimappata, qinnuteqartoqarneratigut taarsigassarsiallip taarsigassarsiaasa ilaat, piginnittut nikinneranni isertitanit matussuserneqarsinnaanngitsut Naalakkersuisut isumakkeerinnissutigissavaat.

*Imm. 2.* Qinnuteqaammik naliliiniarnermi pingaartumik qinnuteqartup pisuussutai inuussutissarsiorsinnaanermullu piginnaasassaatur naatsorsuutigineqartoq, tunisinermi pissutsit, tassunga ilanngullugu tunisinermi aki pitsaanerppaaq anguneqarsimanersoq, eqqarsaatigineqassapput.

*Imm. 3.* Naalakkersuisut imm. 2 naapertorlugu qinnuteqaatit sananeqartarnerannut, suliarineqartarnerannut naliliiffigineqartarnerannullu sukumiinerusunik maleruagassiorsinnaapput, tassunga ilaallutik isumakkeerinissamut isertitatigut pisuussutinillu pigisaqarnikkut piumasaqaatit suut naammassineqarsimassanersut, kiisalu tunisinissap naliliiffigineqarnerani pissutsit suut ilaatinneqassanersut."

Allannguutissatut siunnersuummut oqaaseqaatit

### **Oqaaseqaatit nalinginnaasut**

Peqqussutissatut siunnersuummut allannguutissatut siunnersuummik saqqummiussinermut Inatsisartut Attaveqatigiinnermut Ineqarnermullu Ataatsimiititaliaata inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutissaattut siunnersuummut isumaliutissiissumminni oqaaseqaataat inassuteqaataallu tunngavigineqarput.

Siunnersuut siullermeerinerme saqqummiunneqartoq Namminersornerullutik Oqartussat kommunini inissianik attartortittakkanik sanaartornermut tapiissuteqartarnerannut aalajangersakkanik imaqarpoq, [issuaaneq aallartippoq]  
"...kingunerisaannik Nuup Kommunea kommuninit allanit tamanit ajornerusunik

*inissinneqarpoq. Tamanna piginneqatigiilluni imaluunniit nammineq pigisatut inissiamik realkreditimit aningaasalersorneqarneqartumik Nuummi najugallit pissarsisinnaaner at nunatsinni kommuninut allanut sanilliullugu ajornanninnerusooq inatsimmut nassuiaatini tunngavilersuutigineqarpoq.*

*Tamatumunnga tunngatillugu ataatsimiititaliamit oqaatigineqarpoq, nunatsinni kommunit sinnerinut sanilliullugu piginneqatigiilluni namminerluunniit pigisatut Nuummi inissiamik realkreditimit aningaasalersorneqarneqartumik innuttaasut ilaasa akissallit nunatsinni innuttaasut ilaannit ajornanninnerusumik pissarsisinnaaner at ilimanarsinnaasoq. Tamannali Nuup Kommuniata (initaarnissamat ukiunik 28-nik utaqqiffiusartoq) inissianik nalinginnaasunik pisariaqartitsineranut annerpaajusumut matussuserneqanngitsumulli allannguutaanngilaq.*

*Tamanna tunngavigalugu Nuummi kommunit inissiaataannik attartortittakkanik sanaartornermut Namminersornerullutik Oqartussat tapiissutaasa kommunini allani kommunit inissiaataannik attartortittakkanik sanaartornermut Namminersornerullutik Oqartussat tapiissutaannit ikinnerunissaat naammaginaranilu naapertuutinngilaq.*

*Taamaattumik kommunit tamarmik assigiimmik tapiiffigineqarnissaminnut qulakkeerniarlugu Ataatsimiititaliap isumaqatigiissup Naalakkersuisut allannguutissatut siunnersuummik saqqummiussinissaat kaammattuutigissavaat."*  
[Issuaaneq naavoq]

*Ataatsimiititaliap oqaaseqaatai inassuteqaataalu Naalakkersuisunit tusaatissatut tiguneqarput, tamatumunngalu atatillugu inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaannut allannguutissatut siunnersuut manna saqqummiullugu, taannalu malillugu kommunit tamarmik inissiani najugaqarfii annertussusaanni kvadratmeterimut tapiissutaasartunut tunngatillugu kommunit tamarmik assigiimmik pineqarsinnaalissapput.*

*Isumaliutissiisummi allassimavoq [Issuaaneq aallartippoq] "Inuit inuiaqatigiinnut akiitsuminnik akiliinissaminnut periarfissaqanngitsut inuiaqatigiinnit immikkut isiginiarneqarner at pissusissamisoorluinnartut at ataatsimiititaliamit isumaqatigiissumit isigineqarpoq. Tamatumali akiitsunik isumakkeerinikkut pinissaa inuiaqatigiit soqutigisaannut naapertuutinngilaq. Illumi taarsigassarsinikkut pissarsiarineqarsimasooq suli naleqarpoq akiitsut isumakkeernerisigut inuiaqatigiinnik annaaneqartussamik. Illu kingusinnerusukkut tunineqarsinnaasoq paasinarsippat, taarsigassarsisoq akiitsuminik isumakkeerfigineqarsimasooq aningaasanik taarsigassarsisitsisup – tassalu inuiaqatigiit – pissaraluinik pissarsissaaq.*

*Taamaattumik immitsinnut aperisariaqarpugut inuiaqatigiit pigisaat nalillit tunniussuutiinnartuarnissaannut akissaqarnerluta. Akiitsunut koruuni ataaseq isumakkeerutigigaangatsigu ineqarnermut tunngasuni ajornartorsiutit*

*kinguartitassaangitsut aaqqiiviginiarnissaannut koruunimik ataatsimik atugassakinnerulertarpugut.*

*Taamaattumik allannguutissatut siunnersuummik saqqummiusseqqullugit Naalackersuisut ataatsimiititaliamit kaammattorneqarput, taamaalilluni § 39 aamma 41 malillugit akiitsunik isumakkeerfigineqarnissamut periarfissaq peerneqarluni, akiitsunillu nalikillilerneqartussaananik taarsigassarsianut erniaqaratillu akilersugassaangitsunut aammalu illumik allamik piginnittoqalersillugu akilerneqartussangortussanut allangortitsinissamut periarfissamik taarserneqarluni.*

*Taamatut periaaseqarnikkut taarsigassarsialik akiitsunik artukkigaasimasoo akilersuutunik ernianillu akiliissangilaq – soorlu akiitsunik isumakkeerinermi taamaattoq. Tassa taarsigassarsialik kiassarnermut innaallagissamullu akiliutit eqqaassanngikkaanni ineqarnermut akiliuteqartassanani. Akiitsunilli isumakkeerinerup akerlianik akiitsut piujuassapput, illulu tunineqarpat taakku akilerneqassallutik. Namminersornerullutik Oqartussat illumi qularnaveeqqusiissuteqarmata illu naleqarsimappat Namminersornerullutik Oqartussat aningaasat ilaannik pisassaminnik pissarsissapput.*

*Tunisinermi pissarsiat akiitsunik matussusiinissamut naammangippata akiitsut sinneri taarsigassarsiallip akilissavai. Inuit taamatut inissisimasut akiitsuminnik isumakkeerneqarnissaminnut qinnuteqarsinnaasariaqartut Ataatsimiititaliaq isumaqarpoq." [Issuaaneq naavoq]*

Naalackersuisuniit ataatsimiititaliap oqaaseqaatai tamakkiisumik taparserneqarput, tamatumunngalu atatillugu inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaannut allannguutissatut siunnersuut manna saqqummiullugu.

Allannguutissatut siunnersuutip inatsisinut teknikkimut tunngasortai misissuiffigineqareerput.

*Peqqussutissatut siunnersuutip allaffissornikkut sunniutissai*

Allannguutissatut siunnersuut peqqussutissatut siunnersuummut naleqqiullugu allaffissornikkut nammagassanik annertunerusunik kinguneqassanngilaq.

*Peqqussutissatut siunnersuutip aningaasaqarnikkut sunniutissai.*

Allannguutissatut siunnersuut peqqussutissatut siunnersuummut naleqqiullugu aningaasaqarnikkut sunniuteqartussaavoq, tassalu inissianik attartortittakkanik sanaartornermi Nuup Kommuneanut tapiissuteqartarnermi kommuninut allanut tapiissutaasartut amerlaqataannik qaffasinnerusunillu tapiissuteqartoqartalissaq.

## **Peqqussutissatut siunnersuummi aalajangersakkanut ataasiakkaanut oqaaseqaatit**

### *Nr. 1-imut*

Aalajangersagaq inissialiortiternermut tapersiissuteqartarneq pillugu Inatsisartut peqqussutaanni nr. 1-mi 9. april 1992-imeersumi, kingusinnerusukkut allannguuteqartinneqartumi § 7, imm. 1-imut aamma 2-mut najoqqutassatigut allannguuteqarluni assingusuvoq.

Aalajangersakkami kommunit inissiaataannik attartortittakkanik sanaartornermut Naalackersuisut kommuninut tapiissuteqarsinnaanerit tunngavissinneqarpoq. Tapiissuteqarnissamut piumasarineqarpoq kommunit inissianik sanaartortut angissusissatut piunasaqaatinik, aalajangersakkami aalajangersarneqartunik naammassinnissimanissaat. Tassalu tapiissutit annertussusissaannik aalajangersaasarnermi kommunit assigiinngitsut akornanni immikkoortitsisoqanngilaq. Kommuni tapiiffiqineqarsinnaanersoq aalajangiinermi aningaasaliissutissat Inatsisartut aningaasaqarnermut inatsisaanni immikkoortinneqarsimasut pisoqarneri tamaasa pingaarnersiorneqartassapput.

### *Nr. 2-mut*

Nuup Kommuneanut aamma nunami kommuninut allanut tapiissutaasartut annertussutisimikkut assigiinngitsunik aalajangersarneqarnerisa peerneqarnerisigut aalajangersakkami imm. 3 peerneqarpoq, tamatumalu malitsigisaanik imm. 4 imm. 3-nngorpoq.

### *Nr. 3-mut*

§§ 39-41-mi allannguinerup malitsigisaanik immikkoortumut qulequtaq allanngortinneqarpoq. Allannguutissat taakku allannguutissatut siunnersuummi nr. 4-6-imut oqaaseqaatini nassuiarneqarput.

### *Nr. 4-mut*

Aalajangersagaq nutaajuvoq, kisiannili inissialiortiternermut tapersiissuteqartarneq pillugu Inatsisartut peqqussutaanni nr. 1-mi 9. april 1992-imeersumi, kingusinnerusukkut allannguuteqartinneqartumi § 21a, imm. 2 tunngavigineqarpoq tassungalu taartaalluni.

Taarsigassarsiallip inissiami Naalackersuisunit taarsigassarsiaanut akiliutinik akiligassanngortunik, akiitsunik akilinngitsuukkanik, akileeqqusissutininut akitsuutinik akiitsullu sinnerinik allanngortitsisinnaaneranut aalajangersagaq tunngasuvoq. Aalajangersakkami isertitassatut piunasaqaatit qinerneqarsinnaasut marluk

atorneqarput. Taarsigassarsiallip inoqutaani siunissami qanittumi isertitassat ukiumut 180.000 koruunit inorlugit annertussuseqalernerinik kinguneqartussamik pisoqareertillugu isertitassanut piumasaqaatip atorneqarnissaa eqqarsaatigineqarpoq. Assersuutigalugu taarsigassarsialik siusinaartumik pensionisiaqalersimasinnaavoq utoqqalinersiutisiaqalersimasinnaalluniluunniit, taarsigassarsiallip aappani inooqatiniluunniit annaasimasinnaavaa, taamaattumillu taarsigassarsiallip inoqutaani isertitassat siornatigumut naleqqiullugu ataavartussamik appangaatsiartussatut naatsorsuutigisariaqalersimallutik. Taarsigassarsiat uninngasut uninngatikkallagaassapput ernialersorneqartaratik aammalu akilersuutit akilerneqartussaanaatik.

Aalajangersagaq aamma akiligassanngortitsisarnissamut aalajangersagaavoq. Taarsigassarsialik tammarsimappat tamanna eqqartuussivitsigut aalajangiiffigineqartariaqarpoq, tassanilu taarsigassarsiallip tammarsimanera, taamaalillunilu tammarsimasut pillugit inatsimmi, kingusinnerusukkut allannguuteqartinneqartumi § 5 naapertorlugu toqusimasutut naatsorsuutigineqarnera aalajangiiffigineqassaaq. Nalinginnaasumik tammarsimasut, kingullermik suli inuusutut ilisimaneqarnerminniit ukiut tallimat qaangiunnerini toqusimasutut nalunaarutigineqartarput, tak. tammarsimasut pillugit inatsisip nalunaarutigineqarnera nr. 766, 4. august 2005-imeersoq.

Kiisalu aalajangersagaq piginnittut nikinnerannut nassuiaatinik imaqarpoq. Piginnittut nikinneri tamarmik akiligassallit nikinnerattut paasineqassapput, tassunga ilaallutik niuernikkut imaluunniit akeqanngitsumik tunniussinerit, taamatullu piginneqataasumut, aappaasumut, aapparisaatut nalunaarsorneqarsimasumut, kingornussisussanut inooqatigisamulluunniit tunniussinerit ikaarsaartitsinerilluunniit piginnittut nikinnerattut isigineqarlutik.

Isertitassanut killiliussanut § 39, imm. 1-imi taaneqartunut tunngatillugu, § 39, imm. 2 malillugu taarsigassarsialik 18-it inorlugit ukiulinnik angerlarsimaffimmi najugaqartunik qitornaqarpat, isertitassanut killiliussat 180.000 koruuniusut meeqqamut ataatsimut 4.000 koruuninik qaffanneqartassapput. Tamanna meeqqanut amerlanerpaamik arfinilinnut atuuppoq.

Assersuutigalugu taarsigassarsialik tallimanik angerlarsimaffimmi najugaqartunik qitornaqaruni, taarsigassarsialik ukiumut inoqutigiinni akileraaruteqaataasussanik 200.000 koruunit inorlugit isertitaqartarsimaguni, akiitsumi allannngortinneqarnissaannik qinnuteqarsinnaavoq.

#### *Nr. 5-imit*

Taarsigassarsiallip akiitsui sinneqaratik taamaallaalli akilinngitsuukkanik akiitsoqartillugu, taarsigassarsiallip akiitsuinik allannngortitsisarneq aalajangersakkami pineqarpoq. Taamaattoqartillugu akiitsut ingerlaannartumik taarsigassarsiatut erniaqanngitsutut akilersugassaanngitsutullu, annertoqqatigiinnik aningaasartalerlugit qaammatini 60-imi nalikilliartuaartinneqartussatut allannngortinneqassapput.

Taarsigassarsiallip inissiamik Naalackersuisunut utertitsisinnaatitaanera aalajangersakkami kalluarneqanngilaq, taarsigassarsiat imaluunniit taarsigassarsiat arlallit taarsigassarsiatut erniaqanngitsutut akilersugassaannngitsullu allanngortinneqaraluartut inissiamut taarsigassarsiat ingerlaannartussaammata.

*Nr. 6-imut*

Aalajangersagaq nutaajuvoq.

§ 41, imm. 1-imut

§ 39, imm. 1 naapertorlugu taarsigassarsiat uninngatinneqartut illu taarsigassarsialimmit pigineqartillugu ernialersugassaannngillat akilersugassaanatillu. Taarsigassarsiat akiligassanngortinneqarnissaannut piumasaqaat atuutilerpat, taarsigassarsiallip taarsigassarsiat ernialersugassaannngitsut akilersugassaannngitsullu ataasiaannaartumik aningaasanngorlugillu utertillugit akilissavai.

Niuernermi qilersorsimannngitsumi pigisanik aalaakkaasunik niueruteqarnermi pigisat nalingi, pigisat sumi inissisimanerat apeqqutaalluni akii allanngorartorujussuusinnaammata tamanna ilumoorpoq. Taamaattumik assersuutigalugu illut type 67/12-t, Godmand-imik imaluunniit Salomon-imik taaguuteqartut, illut Nanortalimmi, Nuummi, Sisimiuni Qaanaamiluunniit inissisimangersut apeqqutaalluni niuernikkut niuerutigineqarnerminniluunniit akii assigiinnngitsorujussuusussaapput. Kisiannili assigiissutaat tassaavoq tamangajammik sananeqarnerminni akii assigiimmata, tassalu teknikkikkut aningaasaqarnikkullu naligititaasut assigiillutik.

Illut assigiit pingasut pisoqaaqatigiit Nanortalimmi, Nuummi imaluunniit Qaanaami neqerooruteqarfigitinneqarlutik tunineqassappata, tunisinermi akiusut 1,6 mio. koruunit sinnerlugit nikerarsinnaapput. Allatut oqaatigalugu Nuummi illu assersuutigalugu 1,7 mio. koruuninik akeqartillugu tunineqarsinnaavoq, kiisalu Qaanaami illu taamaallaat 100.000 koruuninik pissarsissutigineqarsinnaalluni.

Taamaattumik Nuummi tunisisup taarsigassarsiani uninngasut matussusersinnaassagai naatsorsuutigineqarsinnaavoq, kiisalu Qaanaami tunisisup akiitsuisa sinneri, tunisinermi pissarsiaasunit matussuserneqarsinnaannngitsut qaffasingaatsiarsinnaapput. Taamatut pisoqartillugu taarsigassarsialik piumasaqaatit aalajangersimasut ataanni illumit tunineqarsimalersumi, taarsigassarsiallip iluaqutigiunnaagaani akiitsut sinnerisa isumakkeerneqarnissaannik Naalackersuisunut qinnuteqarsinnaavoq.

§ 41, imm. 2-mut

Aalajangersakkami allassimavoq taarsigassarsialik taarsigassarsiaminut akilersuinissamut periarfissaqarnersoq Naalackersuisut ataasiakkaatigut naliliisassasut. Tassalu taarsigassarsialik ukiuni akileraaruteqarfiusuni marlunni kingullerni inoqutigiinni ukiumut 180.000 koruuninik amerlanerusunilluunniit

akileraaruteqaataasussanik isertitaqarsimanersoq, imaluunniit siunissami isertitaqartussatut naatsorsuutigineqarnersoq tamatumani naammangilaq.

Taarsigassarsiallip nalilinnit pigisai inuussutissarsiorsinnaaneratullu naatsorsuutigisaaq kiisalu illup pisoqaassusaa, qanoq issusia aammalu tunisinermi pissarsissutaanerata nalinga Naalakkersuisut pingaartissavaat. Kisiannili qinnuteqartoq akiitsuminik isumakkeerfigineqarsinnaanersoq naliliiniarnermi, akiitsut sinnerisa annertussusaat immikkut pingaarutilittut inissisimangilaq. Taamaattumik taarsigassarsiat annikitsut annertuullu isumakkeerinniffigineqarsinnaapput.

Inissiaq kuuginnartumik imeqangippat, kuuffeqangippat innaallagiaqangippallu, atortulersuutit taaneqartut pigineqarnerannut sanilliullugu inissiap nalinga appasinnerusumik aalajangersarneqassaaq.

Inissiaq iluarsaateqqammersimappat, soorlu nutaanik igalaalernerqarsimappat, nutaamik qalialernerqarsimappat nutaamilluunniit oqorsaqqinneqarsimappat, tamatuma kingunerisaanik inissiap iluarsaanneqanginneranut sanilliullugu inissiap nalinga qaffasinnerusumik aalajangersarneqassaaq.

Ataatsimut isigalugu akiitsunik isumakkeerisarneq taamaallaat atorineqartariaqarpoq, inissiaq niuernikkut naleqangippat aammalu taarsigassarsiallip akiitsumi sinnerinik akiliisinnaanissaa ilimanaateqangippat. Piumasaqaatit taakku naammassineqarsimangippata, akiitsunik isumakkeerinissaaq ataatsimut isigalugu atorineqartariaqangilaq. Taarsigassarsiallip illu akigissaartumik tuneriarlugu akiitsut sinnerinik isumakkeerfigineqarnissamik qinnuteqarnermigut iluanaarniarsinnaavoq.

§ 41, imm. 3-mut

Qinnuteqaatit sananeqartarnerannut, suliarineqartarnerannut naliliiffigineqartarnerannullu Naalakkersuisut sukumiinerusunik maleruagassiorsinnaanissaannut aalajangersagaq piginnaatitsissutaavoq, tassunga ilaallutik isumakkeerinissamut isertitatigut pisuussutinillu pigisaqarnikkut piumasaqaatit suut naammassineqarsimassanersut, kiisalu tunisinissap naliliiffigineqarnerani pissutsit suut ilaatinneqassanersut.